



Gezèt vaan

# DE KEEMELEERS

68ste jaorgaank

oetgever: Vastelaovendsvereiniging De Keemeleers

www.keemeleers

Fibberwarie 2017

## VORS LARS LXVIII

LITTERATORICUS \* DECANTARICUS \* MINISTRATOR \* GERMANICUS

**Beriech vaan de Kanselarijraad aon de oonderdaone vaan Keemelstad, gelege aon d'n ooskant vaan de Maos en eederein dee mèt luustert: salut!**

Door 'nen helle slaag waor Kemiëlke in eine kier klaorwakker. Wat gebäörde noe? Wee haolde 't in ziene kop um häöm oet ziene zomerslaop te haole mèt dat vreiselek kebaal? Koelek vaan de sjrik bekoome spróng heer oet zien hangmat en voolt geliek nategheid onder zien veer pu. En jao huur, heer stoont tot aon zien kneeje in 't grondwater. Zien hangkas dreef 'm al tegemoet en heer kós nog zjus e paar werm zokke en ziene jas vaan ech kemelshaor redde en make tot heer boete kaom, veurtot 't water häöm tot aon de bölte kaom. Einmaal boete ziene stal zaog heer wat gaonde waor: heer stoont aon de rand vaan de kojil vaan de in aanbouw ziende opslaagplaats veur aajd iezere aon de statie. E look zoe groet en zoe vol water wie 't zwumbad vaan Jekerdal, boe me beton aon 't storte waor. Dao geit miene stal, dach Kemiëlke en leep mótsentere in de riechting vaan de kèrktore vaan 't Zwart Kruus.

Kemiëlke loerde nao bove nao de stareloch, en leunentere tege de gievel vaan de Martinuskèrk, boe pestoer Tardier zjus de klokke had gelojd, wachde heer op de Kanselarijraad. 't Waor weer zoe wied. Vendaog zouwe zie naomelek op zeuk goon nao de nuie Vors dee de Keemeleers zouw veurgoon in dee manjefieke Keemelriekse Vastelaovend. Dat weurt daan veur d'n 68e kier tot in Wiek door de Keemeleers dat fies veur groet en klein weurt geranzjeerd en eder jaor is 't weer sjoender es 't jaor daoveur. Kemiëlke woort get zenewecheig. Boe bleve ze noe, die aandere vaan de Kanselarijraad? Heer begós aon zien eige te twiefefe. 't Waor toch bij d'n tore vaan de kèrk tot ze aofgesproke hadde en neet bij dat staolegeval wat ze in de Stationsstraat hadde neergezat? Dee "klim-op" boebij me, es me mèt gevaar veur eige leve bove waor aongekoume, op ze gemaak kós binneloere bij de lui die dao bove die zake woende, es-ofste op viziet kaoms. Me kós es me wouw mèt die lui koffie drinke aon hun keuketaofel.

Kemiëlke had bijnao de mood opgegeve en wouw zjus bij Kien, die ope waor, nao binne goon veur e Kemiëledröpke wie heer dee Nuie aon zaog koume, nog altied e bitteke veurzichtig meh zörgzaam en slum um ziech heen loerend. Vaan um d'n hook sjäörde 't Evermenneke op ziene renfiets de straat in, zjus wie dee Zekere mèt zien hunneke vaanoet 't tunnelke onder de Wilhelminabroëk wouw euversteke. "Mieljaar," reep dee, "zien 't neet de bösse in Wiek die d'ch oondersteboue rije of d'n tram oet Hasselt, daan bis diech dat wel op diene velocipède. Let toch



'ns op, verdwaalden Dumoulin, de Ridderrunde kump al lang neet mie aon deze kant vaan de Maos!"

Vaan d'n ambras bekoome maak de zie ziech op um op weeg te goon. Vaanoet de gooj kamer vaan Wiek aon d'n euverkant vaan de straat kloonke hiel stèl-lekes flarde vaan "Hei zien veur uuch de Keemeleers, vastelaovendsvrund vaan Wiek", es-of de geis vaan Lenie Menten op vleugelkes mèt hun mèt vloog. 't Evermenneke kraog mètein e hart wie e broed, dee Zekere mèt 't hunneke straalde en zaog tot 't punteg stertsje vaan 't bieske hiel veurzichtig e bleik blauw sjijnsel begós aof te geve. Kemiëlke gong veurop en de Nuie dach slum te zien en spróng achterop de fiets bij 't Evermenneke zonder te beseffe tot 'ne renfiets geine bagagedreger heet... Mèt 'n hoeg stum en traone in zien ouge vlookde heer de ganse wereld bijein. Kemiëlke reep, mèt e sjeel oug geriech op de kèrk: "Vlook toch neet zoe, Slivvenier zal diech nog ins daoveur straove!"

Umtot ze neet gezeen mochte weurde in de straole vaan de doezend lempkes die Wiek verliechde, bewoge ze ziech in de sjaduw vaan de kiekoeete. De Nuie leep nog get oongemekelek en me kaom langs Tuutsje vaan Teunsje. Op de vraag vaan 't Evermenneke of nog eine 'ne gehakbal wouw, kreeg heer allein mer e snepeteg antwoord trök vaan de Nuie. 't Hunneke bleef oondertösse mer trèkke aon zien lijn tot op 't pleinsje veur de Poshoorn. Dao sjaarde 't Evermenneke ziech 'n gezèt bij 't poskentoer op d'n hook en laos hel-op veur tot d'r vors woort gemeld mèt naome aon d'n deepen ooskant vaan Mestreech. Bij 't hure vaan die wäörd begos 't hunneke te bleffe, zie stertsje woort dreikwaart blauw en heer riechde zie köpke op. Kemiëlke zien bölte begóste te bubbele en dee Nuie kraog op slaag zien gewoen stum weer trök.

'ne Flinke wind dee vaan vöore kaom, trok obbins de gezèt oet de han vaan 't Evermenneke en de losse blaajer vaan de Limburger dansde de loch in, achterein wie 'ne rijaloet en vlogte euver de hoezer en 't spoor in de riechting vaan 't Keuningsplein.

De Nuie en dee mèt 't hunneke aon de lijn sprónge op de rögk vaan 't

vervolg op pagina 2

(vervolg veurpagina)

Kemielke en hele ziech vas aon zien twie bölte wie dee wie 'ne bezetene begós te renne um zoe gaw wie meugelek aon d'n aandere kant vaan de statie te koume. 't Evermenneke fietsde ziech z'n longe oet zie lief en vloog tösse de twie slaagbuim vaan d'n euverweeg door euver 't iezere spoor. Achter de gezèt aon die hoeg in de loch stèlleskes aon veranderde in e snoer vaan sjitterende witte en blauw lempkes wat hun de weg wees euver de KWA-tunnel en d'n A2 zaoleger, wijer en deper Mestreech-Oos in. Bij 't ierste verkiersplein góng 't gewoen rechdoor, meh bij 't twiede móste ze iers 11 rondsjes make veurtot ze dreijereg en duzeleg in de gate hadde tot de kèrk vaan Sjaan vol aongestraold waor en häör klokke leet lojje es-of ze wouwe zègke: "Noe kom, iech wies uuch de weeg". De start vaan 't hunneke waor al hielemaal blauw en dao begós meziek te speule. Es me good luusterde, hoort me ze allemaal. Die sjoen Mestreechter vastelaovendsleedsjes, de hermeniekes, 't volk vaan Mestreech en hei en dao zelfs karemeziek. De slinger vaan leech begós aon zien aofzink in de riechting vaan ein vaan die Sjaander straote en drejde ziech toen um de sjouw vaan 't hoes vaan de maan dee veurbestump waor um es 68e Vors vaan de Keemeleers 't Keemelriek veur te goon. Heer stoont aon de deur mèt 'ne microfoon in zien han 't Mestreechs Volksleed te zinge en reep bij 't zien vaan de Kanselarijraad "Jao, iech wèl!" nog veurtot häöm de vraog veurgelag waor.

Kemielke telde zes köp die in de ganse straat confetti struide. Roete vlogte ope, blauw witte balonne dansde op de maote vaan "Veer zien de kinder vaan 't Mooswief". Euver gans Sjaan hóng 'n blauw mèt zèlver gekleurde klaor loch en de lui in de straote ginge vaan veur nao achter en vaan links nao rechts of ze vleugels hadde, 't waor zjus of ederein zweefde.

Koelek bekoume vaan 't jachte en jaoge achter de gezèt aon, zaog Kemielke alles gebäöre. 't Hunneke lufde vaan d'n ambras zie puutsje op tege de brookspiep vaan de Nuie. 't Evermenneke pakde ziech get extra loch oet zien fietsepomp. En Kemielke zaog tot 't good waor. De Keemeleers hadde weer eine gevoonde boevaan me achteroaf zal zegke... "Zoe 'ne gooje höbbe veer nog noets gehad"... Heer drejde ziech um en maakte ziech stèlleskes oet de riezter um op zeuk te goon nao 'ne nuie stal, örges deep verborge in 't sjoenste deil vaan Mestreech, in zie Wiek, in Keemelstad.

# Veurwoord vaan de prizzedent

"Nao vääre", dat is eigelek e beter gezègkde es "veurwoord". In zoe stökske teks kiek me jammers altied veuroet nao get wat koume geit. Achterum kiek deit me bijnao noets, want wat gewees is, is gewees en kump neet mie trök. Meh wat noe, es dat wat gewees is zoe sjoen waor tot me daor e hiel gooj naobedach bij heet! Daan maag me toch zeker ouch in e "veur-oet" stökske "achter-um" kiek? Daorum num iech uuch es lezer vaan dees Keemeleersgezèt toch nog effekes mèt trök nao eus aofgeloupe seizoen in Keemelstad.

67 jaor Vastelaovend in Wiek! Enthousias veurgegaange door euze Vors Egidius de 67e en zien bezunder charmante Véronique höbbe de Keemelers laote zien tot de Vastelaovend in 't Keemelriek springlevend is. Keemeleerszondag, de senioremiddag, de Wieker Paraad en eus Vorstebal höbbe vööl Wiekenere en lui vaan daoboete doen genete vaan d'n echte onvervalste Wieker Vastelaovend. Es ambassadeurs vaan Wiek zien de Keemeleers oetgetrokke nao eus zustervereniging in groot Mestreech en nao Mechele, Heerle en Aoke um ouch dao mèt al die vastelaovendsvierders die universeel taol vaan lol en ammezatie te spreke en te zinge.

Es vereniging bestaonde oet de hiere en dames Keemeleers en eus börgermètwerkere höbbe veer hel draon gewèrk um ouch eus financieel fòndemint te verstevege. Veer höbbe gewèrk in de kassa op 't Preuvenemint, achter de garderobes in 't MECC en op de Keersmerret vaan Jos Magermans. Same mèt eus sponsors in de "club vaan 100", eus adverteerders in de gezèt en al die aander lui die us steune es eus dames koume collectere, kinne veer daan ouch veur joonk en aajd eus sjouwers blieve zètte oonder de Vastelaovend in Wiek. En zeker ouch oonder de sjariteit vaanoet Wiek mèt eus bezeuke aon Maosveld, de kinderaofdeiling vaan 't AZM en de Wiekenere die mèt de Vastelaovend jaomer genóg op 't hospitaal mote verbliue. Daorum 'ne groete merci aon eineder dee daon heet bijgedrage!

En noe daan "nao vääre" kiek nao 't 68e seizoen vaan

de Keemeleers. Eine Keemeleer minder: Rick Meisen dee nao Scheveningen is geëmigreerd same mèt zien Stefanie en de pin drin heet gehouwd. Vaanaof dees plaots wèl iech die twie vaan harte bedaanke veur alles wat ze veur eus vereininging gedoon en beteikend höbbe in al die jaore!

Mer ouch 'ne nuie Keemeleer: euzen aajd-Vors Egidius is Keemeleer geworde en geit noe e gans aander leve leie binne eus vereniging es wie heer Vors waor. Egidius, vaan harte welkom bij de Keemeleers!

En veer sjriue historie dit seizoen! Veer höbbe 'ne Keemeleer dee al 44 jaor bij us is, nog altied joonk vaan hart en us es cirremoniemeister al hiel vööl jaore veurgeit. Euver euzen Herman van der Molen lees geer ouch in dees gezèt.

vv De Keemeleers, 'n gezon en groete vastelaovendsfamilie die mèt häöre nuie Vors steit te popele um de Vastelaovend in Keemelstad te goon viere. Sjevraoje en eine groete rijaloet vaan kleure blauw en zèlver dee door eus Wiek trèk en geer maag allemaal aanslete want.....

...."de Wieker Vastelaovend, dat gunt me ziech eine kier per jaor".....

Alaaf en haw pin!

**Ed Moenen**  
Prizzedent



## Leef Vastelaovendvierend vollèk vaan Wiek en Mestreech-Oos,

Perelkes höb iech gezwèt, oonder dat apemaske, wie iech in 'ne groete cortèsj door de straote vaan Wiek woort gebrach. De lui langs de kant vaan de weeg winkde es-of hun leve devaanaof hóng, en de hermenie blaosde häör neet-dissenante toene langs de heuk en pleinsjes vaan 't Keemelriek. 't Waor get kaajd, meh dao höb iech neet vööl vaan geveuld. De manjefieke apotheos bij 't demasqué lojje e magistraol vastelaovendsseizoen in.

Wat höbbe Véronique en iech sjoen mominte mage mètmake. De receptie in Hotel de l'Empereur en alle vereniging die bij us langs zien gekoume, maakde d'n iersten daag compleet. Vrun, familie, ederein dee diech bij us steit, waor debij. De mis in de Sint-Martinuskèrk, boebij d'n ierweerden hier Tardier us allemaal 'ne propele Vastelaovend touwwinsde, waor memorabel. Hiel bezunder waor 't um, es nuie Vors vaan de Keemeleers, acte de présence te geve bij de seniorezitting, um te

danse en te zinge mèt de lui die us de Vastelaovend en de Mestreechter Geis mèt de paplepel höbbe ingegote. De lach op 't geziech vaan dees Wiekenere deeg miech mie good es welke medaalje op de boors daan ouch. Zeker maag iech 't bezeuk aon de kinderaofdeiling vaan 't hospitaal neet vergete. Mèt 'ne króp in de keel kóste veer de kinder, meh zeker ouch de awwers, d'n elend vaan allendaag eve laote vergete. Um, mèt e hart oonder de reem, pin te hawwe en te wete tot Vastelaovend mie is es drei daog plezeer.

De Blauw Sjuut, 't bezeuk aon de basissjaol in Wiek, de carnalogielès bij de inbörgeringscursusse bij Leeuwenborgh en de viziet aon d'n aajdste nog levende vors, Peter XI (!), allemaal petit-histoirekes, meh groete en groutse herinneringe aon mien daog es Vors vaan Wiek. De Zate Hermeniekes die weer en wind trotseerde bij de Wieker Paraad, de cortèsj zonder wagele op vastelaovendsmaondag, d'n openingsdans op 't Vorstebal mèt mien leefste Véronique en alle sjoen en klein mominte; iech gaon ze noets vergete.

Iech wèl ederein dee heet mètgewèrk oet de grond vaan mien hart bedaanke. De Wieker Famfaar, de börgermètwerkere, eus sponsors en ederein dee de Vastelaovend heet meugelek gemaak: 'ne groete merci! En es lèste, de hiere en dames Keemeleers die us neet al-

lein op vorsteleke, meh ouch, en dat is nog vööl importanter, op vrundsjappeleke, gasvrij en werm wijs höbbe mètgenome in 't hart vaan de Vastelaovend.

Bèste groeten oonbekinde, nómmer 68: 't geit vööl te gaw veurbij. Geneet devaan, eder klein momint en edere kier es geer de steek op 't vorsteleke köpke maag drage. Laot mer goon, want dit geveul vergitste noets mie!

'ne groete Mestreechse merci en salut,

**Aajd-Vors**  
**Egidius LXVII**



# WEE IS EUZE NUIE VORS?

Vors Lars 68e deeg in de zomer vaan 1978 op 7 juli zien uigskes ope in Kölle, de vastelaovendsstad vaan eus oosterbure! Lang heet heer dao neet gewoend, want wie heer drei jaor waor is heer mèt pap en mam en zien ajdste breurke Jan de grens euvergestoke en verhuis nao Mestreech. Meh 't bleef e bitteke 'n trèkersfamilie, want nao iers in De Heeg gewoend te hóbbe, trokke ze al gaw nao de "Brusselse Poort", boe zie jongste breurke Sven gebore woort. Aon de rand vaan de "katsj" woende 't gezin, neve draankenhandel "Van Wissem". Behalve de binnekant vaan eus kazjematte heet d'n Hoelöstegheid op jonge leeftied ouch de boetekant en de etikette vaan de versjèllende flesse draank liere kinne. Op latere leeftied is häöm dat nog good vaan pas gekoume.

Nog wie heer op de Odasjaol zaot waor 't al dudelek tot 't menneke mie es ein gaof had. Meziek zaot in de gene want bij de Mestreechse Verkennerband blaosde heer ziech al op jonge leeftied de wengskes bol en roed op de sax, en wie heer d'n euverstap maakde nao de "Keuninkleke" bleef de saxofoon zie favoriet instrumint. Ouch de Vastelaovend zit bij euze Vors in 't blood. Gebore in 't land vaan de "Treue Huzaren" kaom heer al marcherend de wereld in en wie in 1989 de kanselarijraad vaan cv de Bazeleers aon de deur stoont, hoofde heer ziech gein twee kier te bedinke. Es prinske ging heer de kindervastelaovend vaan de Brusselse Poort en umstrecke veur en zóng mèt gans Mestreech "Veer zien de kinder vaan 't Mooswief". Nao de basissjaol mèt good fetsoen te hóbbe volbrach, kaom heer via 't "Stedelijk" terech op de MTS in Sjaan. En dao kaom heer achter nog ein vaan zien talente, naomelek de horeca! Meh neet veur, meh achter d'n tap! In 1996 is heer begonne in 'ne kaffee oppe Merret en via e behuurlek aontal aander horecazake voont heer ziechzelf trök in Wiek in de Poshoorn boe heer zoe'n 5 jaor heet gewèrk. Ouch daanzij euze Vors woort dee kaffee in 2002 "Kaffee vaan 't jaor" vaan gans 't land. En 't heel neet op: 't waor in deezelfde Poshoorn tot heer wel ins op 't bufèt stond mèt e mojliezer in zien han mèt de vraog of heer get wouw zinge. En vaan 't ein is toen 't aander gekoume: wereldbereump is heer toen gewoorde, want door de optrejjes bij de "groetse opening vaan de Wiekervastelaovend" en 't 7 jaor laank zinge vaan de baspartije bij de Mastreechter Staar, woort heer door euzen André Rieu gevraog um mèt te goon op tournee. Zelfs de Waole waore oonder d'n indrök vaan de Vorsteleke stum want ouch aon de "Opéra Royal de Wallonie" heet heer e paar kier mèt mage doen.

Veer sjriev oondertösse al 't jaor 2003 en euze Vors zaot toen op de PABO um te liere wie heer oonderwijzer mós weurde en steeds miejer mós heer bekinne tot 't zinge vaan Vastelaovendsleedsjes häöm toch ech aon zien prij ging. Zès kier heet heer in de finaal gestande vaan 't Mestreechs Vastelaovendsleedsjes Konkoeer en drei kier heet heer same mèt "t Volk vaan Mestreech" en "de Zes Köp" 't winnend leedsje mage zinge.

Begonne es kleutermeister op de basissjaol in Sjaan kaom euzen Hoeglöstegheid via de Terra Nigrasjaol terech op de St.-Michaelsjaol in Mestreech. Dao leep in

deen tied -veer spreke euver 't jaor 2014- 'n zeker Eline Schepers roond, e sjoen meidske oet Kèrkraoj wat ziech es sjaolpsychologe bezig heel mèt 't observeere vaan de lierlinge, mie in 't bizunder mèt die in de klas vaan euze Vors en nog mie in 't bezunder mèt 't observeere vaan euze Vors zelf! Dat observeere lökde zoe good tot ze dat allewijl eder menuut vaan hunne vrijen tied same doen op de baank in hun hoes aon de Churchillaon nómmer 10 in Sjaan. Tot zien Eline, gebore op 16 mei 1991, vaan de kante vaan de "Blauw Sjuut" is, maak häöm niks oet, e sjoender surprieske had heer ziech neet kinne winse! Heer moot wel good nao häör luustere, anders lègk zie häöm in 'nen dobbele knoup, want zie heet de zwarte band (4e dan) in judo. Tegewoordeg wèrk Eline es praktijkondersteuner hoesdokters in de geisteleke gezondheidszörg in Valkeberg, Eijsde en Mergraote, boevaan die twee lètste gemeintes sijns 'n innege verhawwing mètein hóbbe.

Bezunder gruuts is euzen Hoeglöstegheid op zien twee jonges: Tum, 8 jaor en voetballer bij Sjaan, en Zjuul vaan bijnao 7, dee gere creatief bezig is.

Vendaog d'n daag steit euzen Hoeglöstegheid veur de klas op 't Stella Maris College in Valkeberg en gief dao biologie en wiskunde en in 't weekend is heer avontouw te vinde in restaurant De Pastory in Kier boe heer oethölp in de bedening. Heer is gebore op 7 juli 1978 en steit bij de börgerleke stand ingesjreve es

## LARS ERIK FRANZEN

en zal euver 't Keemelriek goon regere oonder de Vorsteleke naome

LITTERATORICUS \* DECANTARICUS \* MINISTRATOR \* GERMANICUS

## VORS LARS LXVIII

Gedecideerd en gecontrasigneerd te Mestreech-Oos en veurgeleze in de boeteloch in 't bijzien vaan 't volk vaan Wiek op 5 fibberwarie, d'n derde zondag veur de Vastelaovend vaan 't jaor 183 kier 11 plus 4.

De Kanselarijraad:

Wino van den Bosch \* Ed Moenen \* Richard Darding

# IFS

INTEGRATED FINANCIAL SERVICES

Verzekeringen

Hypotheken

Sparen

**mr. Eduard H.M. Moenen**

St. Maartenslaan 29,  
6221 AV Maastricht  
Telefoon 043 - 321 48 70  
Mobiel 06 - 23 86 40 92  
info@ifsmaastricht.nl

www.ifsmaastricht.nl



RESTAURANT  
*de Pastory*

IEDERE  
ZONDAGMIDDAG  
lunch menu  
€ 25,-  
3 GANGEN

DI t/m VR  
3 GANGEN  
MENU  
€ 29,50  
inclusief water  
n koffie



Wij heten u van harte welkom in ons Restaurant de Pastory. U kunt hier in een aimabele sfeer genieten van uitstekende, originele gerechten welke zijn geïnspireerd op de Franse keuken, verfijnd en klassiek!  
Ook kunt u terecht in onze prachtige Salle des fêtes. Deze feestzaal is de ideale accommodatie voor al uw recepties, bruiloften, jubilea, promoties, personeelsfeesten, babyborrels en galadiners tot 350 personen.

RESTAURANT DE PASTORY

DORPSTRAAT 45 6267 AA CADIER EN KEER T +31 43 407 18 23

WWW.DEPASTORY.NL



# GALLEPIN 2017

## VASTELAOVENDSVEREINIGING DE KEEMELEERS, WIEK (MESTREECH)

**Dinsdag 31 jannewarie 2017: afsjeid Vors Egidius LXVII**

Venaovend hawwe veer eus protecolair jaorvergadering in euzen hooftempel Hotèl de l'Empereur en numme veer op gepasde wijs afsjeid vaan Vors Egidius de 67e. Ouch reike veer de "loetje pin" oet aon iemes dee vääöl veur Wiek en Mestreech beteikent of beteikend heet. Aonvaank 20.11 oor.

**Zoondag 5 fibberwarie 2017: Keemeleerszoondag**

Vaanaof 13.33 oor trèk euze cortège door de straote vaan Wiek mèt de nog oonbekinde Vors, euze 68e, dee veer aansletend um 14.33 oor bekind make op 't pleinsje onder de klok. Vaanaof 16.00 oor is ederein welkom op eus receptie en de oontvangs vaan aander vastelaovendsvereniging in Hotèl de l'Empereur.

**Zoondag 12 fibberwarie 2017: H. Mès en Seniorezitting**

In de Martinuskèrk weurt 's mörge um 11.00 oor de traditioneel Keemeleersmès gevierd. Um 13.33 oor begint eus groete seniorezitting in euzen hooftempel Hotèl de l'Empereur. De Keemeleers zörgeweer veur 'nen oonvergeteleke middag veur de seniore vaan Mestreech-Oos.

**Zaoterdag 18 fibberwarie 2017: Vorstereceptie en Vorstebal**

Ouch weer in euzen hooftempel Hotèl de l'Empereur begint um 19.33 oor de Vorstereceptie en um klokslaag 21.00 oor opent de Vors eus jaorleks Vorstebal. De meziek vaan venaovend weurt verzörgdoor A Next Band. D'n entree is gratis!

**Zoondag 19 fibberwarie 2017: de Wieker Paraad**

's Middags is 't um 14.11 oor tied veur de jaorlekse "Wieker Paraad". 't Wieker volk kint ziech weer ins good ammezere mèt en werme aon dee bonte störm vaan Zaate Herremeniekes in Keemelstad.

**Donderdag 23 fibberwarie 2017: de Blauw Sjuut**

Zoe roond de klok vaan 19.00 oor vaange veer de Blauw Sjuut oet Heerle op bij 't Brand Beerhoes. In 'ne cortège goon veer nao 't stadhoes vaan Mestreech veur de oontvangs door 't Gemeentebestuur.

**Zoondag 26 fibberwarie 2017: Vastelaovend**

Vendaog trèkke veer mèt in de groete cortège vaan Mestreech.

**Maondag 27 fibberwarie 2017: Vastelaovend**

Vendaog trèkke veer mèt in d'n awwerwètse familiecortège door Mestreech.

**Dinsdag 28 fibberwarie 2017: aoflaote Kemiël**

Um 13.00 oor slete veer euze Wieker Vastelaovend 2017 aof mèt 't umlieghole vaan de kemiël. Daanzette de Keemeleers en de Vors hunne steek aof. Veer goon us nog 'n paar oor ammezere en kieke alweer oet nao de Vastelaovend 2018!

De Keemeleers nudege uuch vaan ganser harte oet ein of miejer activiteite bij te woene, zoetot de Wieker Vastelaovend 2017 e manjefiek fies zal weure. Kiek veur 't actueel program en aander nuits op eus website: [www.keemeleers.nl](http://www.keemeleers.nl)

**COLOFON**

Keemeleersgezèt 2017

Dees nui gezèt is tot stand gekoume door sjrijvers wie Ed, Alex, Bert, Peter, Fred, Vivianne, Johny, Egidius en Richard. Ouch eus adverteerders zien vaan groet belang bij de realisatie vaan o.a. dees Keemeleersgezèt, de seniorematinee en eus aander vastelaovendsactiviteite. Daoveur daan ouch 'ne groete MERCI!!!



Zowie eder jaor woorte de (Mestreechse) tekste gecontroleerd door de taolkemissie vaan Veldeke Krink Mestreech.

De lay-out en d'n drök woort verzörg door de lui die drök zien mèt communicatie vaan Cortjens DC oet Mestreech.

Gezèttekemissie:

Peter van der Veur, Fred Leclair, Karl Pregled en Roel van Wetering

Redactie/Advertenties:

P.v.d.Veur1@kpnplanet.nl

**TWEEWIELERSPECIALIST****AON DE STASIE**

Verkoop Verhuur Reparatie Stalling

**STATIONSRIJWIELHANDEL**

Stationsplein 26 \* 6221 BT Maastricht \* tel. 043 - 3211100

**Nu ook: Sphinxlunet 1, Maastricht**

**WePe-Mode**

*Veur de sjus get aandere Mode!*

In de Rechstraat op nummer 54

“ In de drei Keuninge “ kint geer terech veur o.a.

leuke rökkes, sjieke breuk, wollige truiques, kleurige regejeskes en nog vääöl mie!!!

Dus vroului zeuk geer nog get nuits veur aon te doen, kom daan gerös 'ns binne laope!

( De koffie steit altijd werrem! )




**PREGKA**  
**HORECA CENTRE**

Postbus 3054 - 6202 NB Maastricht - Tel. 043 3610235

- KOELINGEN •
- BEDRIJFSKEUKENS •
- ESPRESSOMACHINES •
- AFZUIGINSTALLATIES •
- HORECABENODIGHEDEN •



# KEEMELEERS ON TOUR

't Kump steeds dèkser veur tot de Keemeleers wied euver de grenze van 't Keemelriek trèkke.

Twie jaor geleie zien v'r op veurspraak van euzen iere-Keemeleer Jo van Os mèt 'n groot gezèlsjap in Enge gewees; de Keemeleersgezèt heet dao oetgebred verslaag vaan gedoon en geer hób dat netuurlek geleze.

't Nui seizoen waor kaajd aon de geng of veer zien alweer boete eus grenze getrooje. Dit doen veer, zoewie altied, mèt ondersteuning vaan Herman en z'n luxe touringcar. Dat zien altied gezèllege reiskes.



Recent zien veer in Aoke gewees op 'n Narretreffe. Aonleijing waor 'n aw medaaje die v'r gere aon de KG Ru Eder Jonge 1952 wouwe trökgeve; dat is us gelök!


Herman heet us ouch nao Sint-Truie gebrach, boe veer door de Orde van de Comeduur oetgenudeg waore op hun Prinzen Pronknacht. Sint-Truie is altied de meujte weerd en veer waore neet (of zjus wel) vreug trök.

't Groot evenemint vaan dit seizoen is toch wel eus reis nao Wörth an der Donau. Dit waor 'n idee vaan Herman, dee de Keemeleersfamilie 'ns wouw verwene umtot heer dit jaor zien 44-jaoreg zjubilei es Keemeleer viert.

Mèt e groot gezèlsjap, boe-oonder de complete cast van de Froeures Copuleurs en de Waggeltenore es support act, trokke v'r nao Duitsland.

Nao 'n lang reis koume veer aon in hotel Butz op 't kèrkplein in Wörth. Dao hóbbe veer lekker gegete en denao trooje veer in vol ornaat aon veur 'ne gezèllegen avond, same mèt de plaotseleke Faschingsgesellschaft Frohsinn Narradonia ('ne ganse moond vol).

Nao d'n dejeuner op zaoterdagmörge zien veer nao 't glaasdörp Arnbruck gegaange. Herman wis dao de weeg, ouch nao de vol glazer. Al wat mèt glaas te make had hóbbe veer dao gezeen.



**Hof- und Staatsball**  
 der FG Frohsinn Narradonia  
 Wörth/Donau e. V.

**14.01.2017 – 20.00 UHR  
 GASTHOF ROSENHOF**

Musikalische Unterhaltung:  
**OTTIS**  
 Original Unterhaltungsorchester

**Premiere des Programms 2016/2017:**  
 Bambini-, Kinder-, Jugend- und Prinzengarde  
 Funkenmariechen *Sula*  
 Kinderprinzenpaar *Anna I.* und *Joseph I.*  
 Prinzenpaar *Victoria I.* und *Martin III.*

Auftritte der Faschingsgesellschaft  
**De Keemeleers aus Maastricht (Holland)**  
 mit ihrem Fürst *Epulius I. V. II.*

Unsere kommenden Veranstaltungen im Fasching 2017:  
 29.01.2017 Zwergfasching (14.00, Gasthof Geier)    26.02.2017 Prunksitzung (18.00, Alte Turnhalle)  
 11.02.2017 Schlafball (20.00, Gasthof Rosenhof)    28.02.2017 Kehraus (19.00, Gasthof Geier)

's Aoves waor 't Hof- und Staatsball in 't dörp mèt 'nen houp "Aja Aja - Bussi Bussi". Naotot veer us sjeel gekeke hadde nao de massa's Tanzmariechen waor 't tied veer eus eige artieste. E fantastisch optreije vaan de Froeures en de Waggeltenore droog bij aon 'ne geslaagden avond aon de Donau. 't Waor euveregens leuk um te zien, wie bij intro vaan de Froeures 't gebreukeleke Deutschlandlied kloonk, de lokale bevolking neet wis of ze noe mós blieve zitte of goon stoon. Op de zondagsen dejeuner waor 't rösteg aon taofel; 't Hof- und Staatsball maakde nog altied indrök. Herman had oondertösse de bös gereid gemaak veur vertrèk riehting Mestreech. Nao 'nen tössestop mèt verrassinge waore veer rond haaf nege weer trök in 't Keemelriek.



## PIEKE POTLOED

bar ★ bistro


Sporenstraat 5    f barbistropiekepotloed  
 6211 EB Maastricht    info@piekepotloed.nl  
 T 043-321 59 68    piekepotloed.nl



**Team**  
 notarissen

Thissen  
 Groutars  
 Vrancken

Avenue Ceramique 105  
 6221 KV Maastricht  
 T 043 - 3282750  
 info@teamnotarissen.nl  
 www.teamnotarissen.nl



sinds 1932

6221 EG MAASTRICHT

E.P.HEUBEL@HOME>NL

T.043 321 82 19

P. HEUBEL

MEESTER SCHOENMAKER  
SLEUTELSERVICE



odysse  
LIFE IS A PARTY DRESS LIKE IT



AVOND- EN FEESTKLEDING

Rechtstraat 92 - Wyck  
www.odysse.nl



USA  
ONE STOP SHOP  
VOOR UW AUTO!  
WIJ SPECIALISEREN ONS  
IN TEVREDEN KLANTEN!



- UITLATEN
- BANDEN
- VELGEN
- TREKHAKEN

- APK KEURINGEN
- GROTE BEURTEN
- KLEINE BEURTEN
- AIRCOSERVICE

- SCHOKBREKERS
- ACCU'S
- REMMEN
- USA CARWASH

DR. BAKSTRAAT 82  
MAASTRICHT / BRUSSELSE POORT  
T 043-343 78 00

WWW.AUTOSERVICEUSA.NL ★ WWW.CARWASHUSA.NL

'Al 35 jaar hét adres  
voor uw mooiste trouwpak'

Cörversplein 12 - 6221 EZ Maastricht - Tel. 043-3217300 - www.jacquetsje.nl

Openingstijden: maandag, dinsdag en woensdag gesloten  
donderdag van 14.00 tot 20.00 uur  
vrijdag van 14.00 tot 18.00 uur  
zaterdag van 11.00 tot 17.00 uur en verder op afspraak

Neet mie es kaffee,  
mer wel es restaurant!



Komp g'r mèt vastelaovend bij us ete?  
Reserve: 043-3217016  
Mariastraot 9 Mestreech



HARRY'S  
Since 1912

WWW.HARRYSRESTAURANT.NL  
WYCKER BRUGSTRAAT 2.  
+31 (0)43 328 1366



# Carnaval Cörversplein

Op zondag 26 fibberwarie bars 't weer los: de Mestreechter Vastelaovend. Op 't Cörversplein in Wiek zèt de WalkAbout kaffee, mèt zien eige carnevalsvereniging "De WalkAbouters", ziech al sinds 2010 in um de Wieker Vastelaovend op 't Cörversplein nui leve in te bloze. Vööl vastelaovendvierders höbbe al kinnes gemaak mèt de charme vaan 't Cörverspleinsje. Es 't zönneke oet is, daan is 't welliech ein vaan de sjiekste pleinsjes um uuch te verzamele mèt familie en gevrün, de hermenie, of aander gezèlsjap.

Es de zon oonder geit, daan trèk ederein de aw brögk euver naor de Vriethof, 't Slevrouweplein of de Merret. De boetetaps slete daan, meh binne geit 't fies gewoen wijer. Boe stoon veer veur:

- Traditionele vastelaovendsmeziek
- Familievastelaovend.
- Zate hermeniekes

Zate hermeniekes wèlle v'r speciaal welkom heite, want dat is d'n aosem vaan de Mestreechter Vastelaovend. Dao wèlle veer get extra's veur doen. Veer zörge veur appetieteke prijze veur drenkskes es géér zörg veur d'n ambras. Ein groete hermenie op 't Cörversplein. Kare zien veer gere koume, meh respecteert wat veer wèlle oetstraole. Laot uuch dus hure es geer hei veur staot. Enne: deile maag!



International Meeting Place

# WalkAbout

Rugby - Sports Bar - Football  
Corversplein 6 Maastricht [www.walkaboutmaastricht.nl](http://www.walkaboutmaastricht.nl)



# ABN-AMRO

*Veer winse uuch 'nne sjieke vastelaovend!*



# HERMAN VAN DER MOLEN 44 JAOR KEEMELEER

Waor 't noe 1972 of 1973 tot Herman gebore woort es Keemeleer? Zeker is tot heer in 1972, wie Henri Cortjens es Vors Henri XXIII de scepter zwejde euver 't Keemelriek, lid is gewoorde, meh meugelekerwijs nog zonder rokkestuum. In 1973 woort Henri opgevolg door Benno Ummels es Vors Benno XXIV en dat waor Herman zienen ierste Vors es Keemeleer! Örges tösse dat afsjeid vaan Henri en 't oetropen vaan Benno is Herman same mèt Huub Stallinga en Sjef Sweelsens geïnstalleerd es Keemeleer. Wie daan ouch, dit jaor viere veer 't 4 x 11 jaorig jubilei vaan euzen Herman!

Mer 't begós dus allemaol in 1972, wie de lede vaan de Keemeleers bijein kaome in de Victoria, dat sjoen gebouw aon de Wieker Brögkstraot boe noe de Algemene Nederlandse Wielrijdersbond is gevestiged. Me góng dao e keertsje lègke, e pötsje beer drinke en vergadere. 't Lidmaotsjap kosde toen 5 gólde in de maand, meh dat waor achteroef gezeen neet genóg um op inneg momint de Victoria te koupe. Neve de Victoria kaome de Keemeleers ouch dèks in kaffee Cottage aon de Hoegbrögkstraot boe 'n zeker Kien achter d'n tap stont.

Es kleine grummel is Herman opgegreujd mèt de Keemeleers in Wittevrouweveld. Jammers, wie de Tempeleers dao wegtrokke, naome de Keemeleers de Vastelaovend euver en zoe kin 't tot Herman nog heet mètgemaak tot de Vors vaan de Keemeleers oetgerope woort op 't Keuningsplein, wie d'r nog geinen A2 waor, laot stoon de KWA-tunnel.

Wie Herman get groeter waor gewoorde en es (veur deen tied) moderne zyp'r aon de geng ging, had heer zoe wie minnegen aandere Keemeleer 'nen draankenhandel en wel in Hier, wat toen nog e zelfstandeg dörp waor. Via 'n aantal aander ondernummers die al Keemeleer waore, wie Jean van Hooren en Henri Cortjens, is heer "debij gekoume" zowie me dat zeet. Mèt es tössestop

e tankstation is Herman oetindelek zie bösbedrief "Nancy Tours" begonne.

Gawwer es wie heer mesjien zelf verwach had, stoomde heer op in de hiërarchie vaan de Keemeleers. In 1975 waor d'r 'n groete wisseling vaan de wach (mach?) en woort Jean van Hooren veurzitter en Ber van Deursen Opper. En jao huur... dao kaom Herman in eine kier nao vöore es... cirremoniemeister. Heer snapde ziech dee stek en heet 'm noets mie losgelaote! En zoe wie 'n eederein wèt dee 't geleze heet in de gezèt: Herman heet dat tot en mèt vendaog op 'n sjieke en zjuste meneer gedoon en maag gerös e veurbeeld geneump weurde veur al die aander cirremoniemeisters in Mestreech en wied daarboete. Es Opper vaan de Keemeleers kin me ziech geine betere cirremoniemeister winse es euzen Herman. E knikske hei, e woord dao en Herman wèt perceis wat moot gebäöre. Wiewäöl Vorste en Keemeleers heer al heet begeleid nao 't in oontvangs numme vaan medaajes is neet mie nao te goon, zoeväöl. Zjus wie 't aantal artieste wat heer op en aof de buun heet geholpe of de rijaloete die heer veurop is gegaange in binne- en boeteland. En altied mèt 'ne lach op zie geziech en méchante vastelaovendskiekerkes onder zien ougsbraoje! Wie 'nen echte chauffeur heet heer de Keemeleers al die jaore door de files vaan de Mestreechter Vastelaovend geloods.



In d'n tied vaan Herman, same mèt onder andere Jean, Ber, Huub, Sjef en Frits, hadde de Keemeleers get boe-op vendaog d'n daag de get awwer lede in eus vereniging zjeloes zien... 'nen lereraad. Me kós dao lid vaan weurde umtot de Keemeleers voonte tot me dao lid vaan kós weurde! Oetindelek waor 't Frits Corten dee es lèste lid vaan deen lereraad 't leech heet oetgedoon.

't Waore dèks oonröstege tije, die beginjaore vaan Herman bij de Keemeleers. 'ne Vors dee op de vrijdag veur de Vastelaovend ziene steek inlieverde en zelf Vastelaovend ging viere zonder de Keemeleers. Of 'ne Vors dee nao de Vastelaovend emigreerde nao Australië zoetot de vereniging 'n vorsteloeze twiede hëlf vaan 't seizoen mós zien door te koume. En soms had me toch get te wieneg lede um ziech reprizentatief te prizzentere en daan kós me lid weurde veur einen daag, möts op en mèt!

De nuie Vors waor dèks al bekind veurtot 'r oetgerope woort. De hoesfotograaf en Keemeleer Jean Clermonts maakde de Vorstefoto en -zoe ging dat nog in deen tied- hóng de ontwikkelde





## Nancy Tours

Herman v.d. Molen

Voor al uw touringcar reizen  
Tel. +31 - (0)43 - 3632558  
GSM +31 (0)6 53 322667

**top class**  
Postbus 4312  
**SETRA**

6202 VA Maastricht  
www.nancytours.nl  
info@nancytours.nl



**LUKOIL** Lanaken,  
Koning Albertlaan 227  
3620 Lanaken  
Mieke v.d. Molen

foto's op aon de waslijn um te druge..... zoetot ederein ze kós zien!

Zoe wie in eder vereininging geit 't bestoon op en neer en zoe roond de jaore '90 ging 't steeds beter mèt de Keemeleers. De organisatie stoont goed en daomèt begós de club ouch 'n steeds beter oetstraaling te krieger. Meh volges Herman zien 't neet allein de Keemeleers, meh zeker ouch de Vors mèt zien familie en zienen aonhaank die 't speul make vaan de Vastelaovend. Daoneve make sommege bezeuke 't seizoen speciaal veur eus vereininging. Dink mer aon al die bösreikes die veer mèt de bös vaan Herman gemaak hóbbe. Nao de Chaussée d'Amour in Sint-Truie, meh mèt eus dames, dus de deure vaan de bös bleve touw. 't Bleef bij kieke, meh neet aonkoume! Of 't schnitzelreiske vaan Herman boebij de pudding vaan 't toetje al drei daog laank op taofel op us heet stoon wachte. Eus bezeuk aon Enge op initiatief vaan euzen lerekeemeleer Jo van Os dee us mèt de nui bös vaan Herman letterlek en figuurlek 't bos in sjikke! En daan noe pas nog (same mèt Gerard van Rens) nao Bayern nao Wörth an der Donau bij gelegenheid vaan Herman zie zjubilei. "AJA...AJA...Bussi...Bussi" reep dao de Faschingsgesellschaft Frohsinn Narradonia es variant op eus eige "Keemeleers....Haw Pin!" Dat reiske hóbbe veer veur Herman in glaas vasgelag es aondinke aon de lol en de ammezatie die veer daor gehad hóbbe! Meh ouch al die kiere tot veer e beroop op de bös vaan Herman dege es veer op einen daag miejer bezeuke móste aoflegke en 't alcoholpromillage bij ederein e strafbaar hoeg niveau bereikde, behalve bij Herman!

De Vastelaovend is e speul en es me dat eimaal in de gate heet daan kin me ziech daor hiel good mèt ammezere. En euzen Herman heet aon die oetstraaling en aon dat speul al 44 jaor mètgewèrk, same mèt zien Mieke. Want laote veer dat neet vergete. Me kin oonmeugelek 44 jaor lid zien vaan 'n club wie de Keemeleers es 't thoesfront dao neet veur mie es 100% achter steit.


Mieke, eus "dame-Keemeleer". In die rol heet zie Herman en eus club in al die jaore gesteund en geholpe. Waor 't neet es buschauffeur um Herman get rös te geve, daan waor 't wel es einmancateringbedrijf veur de bruidsjes of lunchpakette die veer in de bös kreges es de reis te lang doorde of d'n alcohol te väöl waor gewees en veur hoonger had gezörg. Aon Herman en aon de Keemeleers maag geine koume, want daan krijgste ruizing mèt Mieke.

Herman en Mieke, alletwie 4 x 11 jaor bij de Keemeleers. E rokkestuum en e rökske, veer han aon 't stuur vaan de bös, twie geweldige lui binne eus vereininging, twie lui die weite wat 't beteikent um pin te hawwe. 'ne Groete salut aon uuch alletwie, eine bedaank is neet genóg,

daorum bedaank... bedaank... bedaank.



## VV De Keemeleers en de dames Keemeleers felicitere Herman en Mieke me 't 44 jaorig zjubilei



**ROB FELIX**  
**GLASPROJECTEN b.v.**

HR ++ glas...  
een goede  
investering!

**Brusselseweg 530 - 6219 NP Maastricht**  
**043 - 55144343**

**ART**  
**TI**

[www.art-inhospitality.nl](http://www.art-inhospitality.nl)

Uw HoReCa specialist voor...

- ✓ Interim Management
- ✓ Project Management
- ✓ Trainingen
- ✓ Objectbeveiliging
- ✓ Nachtreceptie Diensten Hotels
- ✓ Erkend Leerbedrijf Ecabo

Postbus 5143 / 6202 WG / Maastricht  
Kvk Maastricht 20148041 / Tel. +31 (0)641878367  
[info@art-inhospitality.nl](mailto:info@art-inhospitality.nl) / [www.art-inhospitality.nl](http://www.art-inhospitality.nl)

# LOEDE PIN

In 't naojaor vaan 2009 is bij de Keemeleers 't idee oontstande um eder jaor 'ne persoene te iere mèt de "Loede Pin". De bekinde "Pin" vaan de Keemeleers, meh daan oetvergroot en in loed gegote op e sjoen breet vasgemaak. Iemes dee ziech in eus ouge op wat veur meneer daan ouch verdeenstelek heet gemaak veur Mestreech en veur Wiek in 't bezunder, kint daorveur in aonmerking koume.

En zoe gebäörde 't tot in 2010 door Vors Jack LX d'n ierste Loede Pin woort oetgereik aon Paul Rinkens, op dat momint veurzitter vaan MVV en eigeneer van Town House Hotel in Wiek.

In de jaore die volgde woort de Loede Pin ouch oetgereik aon:

- 2011 – Wim Hazeu – Wèthawwer gemeente Mestreech
- 2012 – Harrie Beaumont – Eigeneer Hotel Beaumont
- 2013 – Lenie Menten (postuum) – Accordeoniste, Mestreechse arties
- 2014 – Sheila Oroschin – OIW en The Masters
- 2015 – Ger Franzen – Eigeneer Hotel & Tapperij de Poshoorn
- 2016 – Frans Theunisz – Zenger, 50-jaoreg jubilei

En noe in 2017 is de Loede Pin oetgereik aon 'ne persoene dee afgeloupe november 45 jaor kasteleinsvrouw waor in 't Wiekse.

Begonne es administratief mètwèrker op de aofdeiling Budgeteren bij de Sphinx op de Boschstraat, kaom zie in 't weekend en de Vastelaovend in kaffee De Postwaegel op de Groete Grach in aonraking mèt de horeca.

Zoe kaom 't tot zie in 1971 häören eigen kaffee opende in de Hoegbrögkstraat in Wiek, de pepèrre um 'ne kaffee te beginne waore nog neet hielemaal compleet. Meh ouch in dee tied móste es ZZP'er dien pepèrre in orde hōbbe. Umtot zie getrojnd waor mèt 'nen Ingelender, woort de kaffee "Cottage" geneump. Wel op zien Ingels oetgesproke. 't Woort al gaw de kaffee vaan 't vereinigingsleve in Wiek, de famfaar en de

Keemeleers waore dao regelmaoteg te vinde. Veur de Keemelers waor dit miestal de lêste kaffee vaan d'n aovend. Deur touw, mōtse aof en same nog 'n eurke ammezere. In die jaore vaan kaffee "Cottage" hōng dao ouch 't symbool vaan de Wiekse Vastelaovend, kemeelke had dao eder jaor ziene vastelaovendsstal.

In 1984, nao 13 jaor, heet zie same mèt de stamgaste kaffee "Cottage" symbolisch begraove. Veur de deur hadde de stamgasten naomelek 'n doedskis geplaoets.

Op zeuk nao 'ne nuie kaffee kaom zie al gaw terech bij 'ne kaffee tegeneuver de Sint-Martinuskèrk vaan Wiek. Dee kaffee waor in han vaan de Ridder Brouwerij en in 1985 begós zie daan ouch Kaffee Swaree. Aajd-mètwèrkers vaan de Ridder koume nog eder kwartaol e pōtsje beer drinke bij Kien de Kaffee. In de beginjaore woorte dao ouch de Zomerfeesten gerangeerd. Bekinde artieste wie Big Benny oet Remun kaom dao gere zinge. Zègk mer gerōs tot dit 't klein Preuvenemint waor.

Vastelaovend en Kien beteikent Lenie Menten op de monica. Vreuger al bij de "Cottage", meh later bij Kaffee Swaree heet Lenie mèt de Vastelaovend de monica laote klinke, ouch nao häör euverlijje blijf de monica nog altied speule in Kaffee Swaree. Eder Vastelaovend is 't veur vāöl lui nog altied 'n verzamelplaots vaan 'ne sjoene vastelaovensdaag, um daonao de brōgk euver te goon.

Es Keemeleers zien veer daan ouch bezunder gruuts drop tot veer de Loede Pin 2017 mage oetrike aon Kien vaan Kaffee Swaree, vanoet de Gooj Kamer vaan Wiek.



hardloopspecialist  
**RON FOR RUN**  
MAASTRICHT

hardloopspecialist  
**RON FOR RUN**  
Rechtstraat 35 Maastricht  
Tel: 043 - 3254903 [www.ronforrun.nl](http://www.ronforrun.nl)



**MULDERS**  
**B O U W**  
**MAASTRICHT**



Ruyters  
& De Koning  
Wijninkoop

Wijnhuis gespecialiseerd in de verkoop van biologische en duurzaam geproduceerde wijnen

Rechtstraat 49, 6221 EG Maastricht  
Tel. 043 - 3210079  
[www.rudeko.com](http://www.rudeko.com)



**Koos**

Bakkerij Koos  
Plein 1992 nr.76  
[www.broodvankoos.nl](http://www.broodvankoos.nl)



**VEERS OET WIECK**

Wim van Appeven  
Wycker Brugstraat 5 - 6221 EA Maastricht  
Tel. 043-3211963 / 06-20408498  
[info@veersoetwieck.nl](mailto:info@veersoetwieck.nl)  
[www.veersoetwieck.nl](http://www.veersoetwieck.nl)  
facebook: @veersoetwieck

## Primäör: nui zwumbad geopend in Mestreech-Oos!

Geer zalt 't allemaol al gezeen höbbe, in Wiek weurt op dit memint hel gewèrk aon d'n allee dee estrein ederen toeris vaanaof de statie Mestreech in leit. En noe is d'r e groet multifunctioneel zwumbad bij gekoume. Me kint noe jammers venaof de böshalte in einen duuk bäänsjes trèkke, op de boek of op de rögk. Ouch kint geer dao, bij vertraging, op eur gemaak in 't water op eure trein wachte.

Dit bad zal de koumende jaore gebruik weure veur de zwumlèsse vaan basissjaol Wyck, veur traininge veur d'n Iron Man, es aofkeulbak veur es in de zomer de mösje vaan 't daak valle, veur 'n Wiekse editie vaan de Duck Race (boebij me neet veur 'n gouwe meh 'n zèlver medaalje geit), en es bassin veur 't tèlevisieprogram 'Ter Land, ter zee en in de lucht'. Ouch zal 't Vastelaovendsjaor dao eder jaor traditioneel geopend goon weure mèt 'ne nuijaorsduuk.

Ouch is me veurnummes 'n Wieks waterpoloteam op te riechte. Es geer neet bang zeet um 'n blauw-zèlver badmòtske te drage en dink tot geer oet 't gooje hout gesnooje zeet, bezeug daan ein vaan de Keemeleersactiviteite en mel uuch aon.



## Groote Sociëteit Maastricht

UNIEKE HORECA-RUIMTEN OP EEN BIJZONDERE LOCATIE

mèt de Vastelaovend  
zien veer 3 daog geopend  
veur joonk en aajd

VRIJTHOF 36 6211 LE MAASTRICHT TEL. 043 3212887

## Slagerij Soffiati



VOOR AL  
UW VLEES  
EN VLEESWAREN

Alexander Battalaan 2a  
Telefoon 043 - 321 34 81  
Maastricht

## Antiquariaat Librairie

# Stille

6221 EH Wyck-Maastricht Rechtstraat 85  
tel +31 43 321 99 23  
stille-antiquariaat@planet.nl

## COFFEE we love LOVERS coffee

MAASTRICHT COFFEE CULTURE

- |  |  |
|--|--|
| CL1 COFFEELOVERS DOMINICANEN<br><i>In fabulous bookstore</i><br>Dominikanerskerkstraat 1 | CL4 COFFEELOVERS AVENUE<br><i>Coffee in the library (1st floor)</i><br>Avenue Céramique          |
| CL2 COFFEELOVERS CÉRAMIQUE<br><i>Urban coffee &amp; lunch</i><br>Ruiterij 2              | CL5 COFFEELOVERS UNIVERSITY<br><i>Students &amp; coffee meeting point</i><br>Bonnefantenstraat 2 |
| CL3 COFFEELOVERS THE ANNEX<br><i>Coffee lounge &amp; terrace</i><br>Plein 1992           | CL6 COFFEELOVERS ST. PIETER<br><i>Neighbourhood coffee corner</i><br>Glacisweg 26                |

Twie mansluij zitte get te praote. Zeet eine: "Iech deenk tot iech gaon sjeie vaan mien vrouw, want ze sprik al 3 maond neet mie mèt miech". "Nouw" zeet d'n aandere, "iech zouw miech nog mer 'ns bedeenke, want zo'e'n vrouw vindste noets mie!".

## Vastelaovend veur de jöög

Dit jaor zal 't jöögprinsepaar vaan Wiek oetgerope weure op basissjaol Wyck. Dit zal gebäöre op vriedag 17 fibberwarie um elf minute euver elf door niemes anders daan Vors LARS de 68e. D'n opzat zal dit jaor get anders zien umtot 't veur d'n ierste kier door de sjaol, in samewèrking mèt de Keemeleers en de Hiere vaan Wiek, weurt georganiseerd.

Kinder mage ziech dit jaor opgeve um prins of prinses te weure. Dit kinne zie doen door ziech te prizzentere mèt e fèlmke of kunswerk, boe-in zie laote zien boerum zie, vaan alle kinder vaan Wiek, 't mies gesjik zien um dees importante taak veur de Wieker Vastelaovend te vervölle. De kanselarijraad heet de sjoen en lestege taak um oet alle inzendinge e prinsepaar en 'ne raad vaan elf te formere.

Hiere  
van  
**Wyck**



Ouch zien veer op zeuk nao 'ne nuie naam veur de carnavalsvereniging vaan eus keendcentrum. De lieringeraad zal 'ne wedstrijd oetsjrieve boebij alle kinder 'ne naam mage opsjikke. Wee wèt weurt diene naam wel gekoze!

KDV en BSO Samen Spelen Wyck en basissjaol Wyck vörme same Kindcentrum Samen Wyck. Same filicitere veer de Keemeleers mèt hunne nuie Vors LARS d'n 68e!

*Jean en Pierre koume langs 'n hoes mèt prachtige roeze langs de gevel. "Miljaar" zeet Jean, "zouwe veer 'ns get roeze plökke veur mien vrow?" "Dat is good" zeet Pierre, "pak 'n lèdder en daan aon de geng". Ze waore zjus bezig, kump 'ne govie dee vreug: "Wat zeet geer aon 't doen?" "Jeh" zeet Jean "hei woent eus vriendin en die is mörge jaorig en noe verseere veer häör hoes". "Dat geit zoe mèr neet" zeet de govie, "geer moot daoveur 'n vergunning hóbbe!". "Ok" zeet Jean, "daan pakke veer alles mer weer aof...".*

## Vastelaovendsvrundsjes

Dao is niks zoe leuk um mèt kinder te doen es veurleze. Die vaan miech góng zeelde zonder e verhäölke nao béd. Es juf op 'n basissjaol geneet iech 't mieste es iech mèt mien kleuters kin goon zitte mèt e book. Mèt roej wengskes, duimke in de moond en groete ouge zuuste ze opgoon in 't verhaol. Netuurlek mote die verhäölkes passe bij d'n tied vaan 't jaor. Mèt Sinterklaos is genóg kääs oet touwpasseleke beuk, wat Keerseemes en Paose betröf 't zelfde. Meh Vastelaovend? Dao is gein ech veurleesbook veur gesjreve, en zeker gei Mestreechs. Dat is e gemis. En daorum hób iech beslote um 't zelf te goon sjrive. Es mama vaan drei kinder die mèt Vastelaovend vaan kleins aof aon woorte mètgesleip, en es juf, hób iech 'n sjatkis aon herinneringe en ervaringe um e book euver vol te sjrive. "Vastelaovendsvrundsjes" is geïllustreerd door Jeannine Brouns-Damen. Zie is 'n begaafde kunstneres die de sjoenste werke maak in alderlei stijle. Jeannine voelt perfek aon wie de illustraties móste weure. Häör tekeninge zien de prachtige keers op dees heerleke toert. 't Beukske nump uuch mèt in d'n aonluip nao Vastelaovend en netuurlek oeteindelek nao dit groet fies zelf. De hoofpersoene, Mila en Nol, koume oet e gezin boe Carneval behuurlek get te zègke heet. Same mèt hun mama en papa en klein zusterke Lieke deit d'n twierling aon bijnao alles mèt wat in de stad Mestreech te make heet mèt Vastelaovend.

Neet allein in 't gezin meh ouch op sjaol weurt dao vööl aondach aon gesjoonke. Mila en Nol en hun vrundsjes en vrundinnekes liere vaan juf Anneke wat Vastelaovend is, wat de Tempeleers allemaol doen, euver alles roontelum d'n Hoegen Hoeglöstegheid en nog vööl mie. En tot d'n twierling aof en touw ins lekker deit boe ze zelf zin in hóbbe, maak 't beukske veur jong kinder dèks hilarisch ... en herkinbaar. Ouch veur groete lui trouwens ...

Iech wins uuch hiel vööl (veur-)leesplezeer en hoop tot dit beukske maag bijdrage aon 't hoeghawwe vaan euze Vastelaovend.

Titel: Vastelaovendsvrundsjes

Auteur: Vivianne Rijnders


Illustratrice: Jeannine Brouns-Damen

ISBN: 978-94-91561-72-7

Prijs: 12,11

Te koup bij De Boekenwurm in de Mariastraat en bij Selexyz Dominicanen.

Wèlt geer mier wete euver 't book of de auteur, num daan kontak op met Uitgeverij TIC, 043-3262414 of kiek op [www.uitgeverijtic.nl](http://www.uitgeverijtic.nl)



## DE KEEMELEERS-VERJONGINGSKUR SLEIT EINDELEK AON

Geer wis mesjiens nog neet tot al jaore binne de Keemeleers 'n discussie gaonde is euver de gemiddelde leeftied vaan de hiere en dames Keemeleers. 't Is naomelek zoe tot deze leeftied drastisch umlieg gebrach moot goon weure um te veurkoume tot de Keemeleers oeteindelek goon indege es kemielfossiele.

In ein vaan de vergaderinge oet 2015 woort vasgestèld tot daan mer get gedoon mós goon weure aon dees vergrijzing. 'n Zoegenaomde Keemeleers-verjongingskuur zouw de oplossing mote zien, zoe woort toen gezag. Tot d'r nuie, jongen aonwas vaan boeten de vereininging mós koume stoont vas, mer ouch woort vasgelag tot 't d'n hoegsten tied waor um binne de vereininging zelf get aon verjonging te goon doen.

In dees belangrieke vergadering woort aafgesproke tot de geboortebeperkende maotregle mer móste weure opgeheve onder de Keemeleers, dit um de zaak get vlot te trèkke.

Tot dees maotregle direk hun vröchte zouwe aofwerpe in 2016, had daan ouch niemes verwach.

Geer moot wete tot binne de Keemeleers 't soms wel jaore doort ie genome maotregle weure oetgeveurd, laot stoon tot die oets effek hóbbe.

Gruuts kinne veer uuch daan noe ouch vertèlle tot op 9 juni en 4 juli vaan 't verleie jaor, door eure verslaaggever twee bewoende weegskes zien aongetroffe in respectieveliek Wiek en Groonsveld.

Daomèt kinne veer ouch vasstèlle tot de Keemeleers-verjongingskuur behuurlek good is aongeslage. De Keemeleers bedaanke bij dezen daan ouch de betrokke lede veur hunnen inzatz.

Veer winse Roel en Janina mèt hun dochter Liselore, die gebore is op 9 juni 2016, hiel vööl gelök, leefde en 'n gooj gezondheid touw.

Ouch winse veer Pieter en Marie-Louise hiel vööl gelök, leefde en 'n gooj gezondheid mèt hun dochter Julie, gebore op 4 juli 2016.

Keemeleers, gaot zoe door en haw pin!

**vormlicht**

Technisch installatiebedrijf

Licht- en krachtinstallaties  
nieuwbouw en renovatie

Domotica

Airconditioning  
Designverlichting

Rechtstraat 8-10 6221 EJ Maastricht tel 043 3215454

[www.vormlicht.nl](http://www.vormlicht.nl)

# In Wiek!

Wiek weurt op de sjöp genome. En neet mer e bitteke! Dao sijnt 'n ondergrondse fietsestalling te koume, meh 't zuut oet of 't e zwumbad weurt mèt alles drop en draon. 't Wiekerbad. Boe de aofmetinge wel kloppe en de sjrouve vaan de sjievel neet nao e jaor al roste. En boe alle Keemeleers gratis mage zwumme. Es ze mer 'n blauw-witte zwumbrook aonhòbbe, 'n fetsojndelege gere, want ze mote wel es zoedaoneg herkinbaar zien. Veur de Dames Keemeleers is dao netuurlek e speciaal dames-eurke. Mèt wellness en 'n zonnebaank. Zoetot ze op 't Vorstebal broengekleurd en strak in 't vel allemaol de stare vaan d'n hiemel kinne danse zonder meuj te weure.

En dee "Klim-op" steit dao ouch neet veur niks. Vaanaof vijf fibberwarie moot edere Keemeleer verpliech èlf kier per daag deen trap op en aof renne. Zoetot ze én mèt Vastelaovend in tópvorm zien én e lijnsje hòbbe boe meinegen Tempeleer ziech e puntsje aon kint zoeke. Dat moot lökke, Keemeleers zien neet veur niks pinhawwers! Haaf Wiek zal oetloupe um ederskier al die Keemeleers te koume aonmoedege. Bovenop deen tore steit daan 'n Keemeleersdame veerdege mèt e gleeeske water en e blauwwit handdeukske um de zweidtróppels aof te vege. Geer krijg nog e ruuster veur wee wienie klim-op-dame vaan d'n daag is. 't Geit trouwens door in alle weersomstandeghede. Zjus wie Vastelaovend. Dee lasse v'r ouch neet aof veur e bitteke snie of rege. Extra warme boersrok aon, waterdiech jeske, gooj sjeun en aon de geng. E Jägermeisterke of get vergeliekbars wèlt ouch nog al ins helpe. Eint hè.

Es Wieker Paraad is, weurt deen tore netuurlek ouch gebrúuk. 't Hermenieke wat 't ierste bove is en daan nog altied 't hoegste vaan d'n tore blaos, krijg zoewiezoe extra punte vaan de jury.

Meh hób geer al ins good um uuch heen geloerd, dao bove op deen tore? Wat 'n oetziech! Edere Wiekeneer veult ziech Vors bovenop de Klim-op! 't Sjoenste stök Mestreech ligk dao aon eur veuj. Wat 'n prachtige pande, de Stationsstraat en Wieker Brögkstraat hòbbe de allure vaan 'ne Pariese allee. G'r kint ouch nog ins gezèlleg bij de lui nao binne kieke en dat lievert zier verrassende beelde op ...


Op sjoen zonnege daog is de loch ouch nog ins Keemelblauw! Wijer kint me tot wied in Mestreech loere en daan concludeert me mer ein dink: Wiek heet 't. Wiek is de glorieus poort nao Mestreech. Dao Vors vaan te mage zien? Meh jonges wat e veur-rech! Bijnao op gelieke huugte mèt 't teurensejje vaan d'n hooftempel Grand Hotel de l'Empereur, boevaan 't goud diech tegemoet sjittert, loupe de sjevraoje euver d'ne straat. Dao weurt astrein weer gefees en gedans, dao viert 't blauw-wit weer hoegtij. En wat zien veer nog mie? De kraom vaan euzen eige Musti mèt zienen onverbeterleke kebab steit prachteg midde in 't beeld. Heer steit dao neet veur niks zo centraol. Musti is inmiddels ouch euvertuig en ingebórgerd Wiekeneer.

't Keemelriek. Blauwwit mèt e gouwe rendsje. 't Keemelriek heet sfeer en allure, gezèllegheid en joie de vivre. En astrein e zwumbad. Mèt wellness, de gooj aofmetinge en zonder mankeminte. 'n Ondergróndse fietsestalling veur mier fietse es tot fietsers zien. Winkels en restaurantsjes. De gezèllegste kaffees. Kebab vaan Musti. Keemelstad is mier es 'n wiek vaan Mestreech. 't Stijg toch get de bovenoet. Noe bekiek diech allein al de prinsewagel. De wagel vaan de Vors is altied d'n hoegste dee in de Vastelaovendscortège mèttrèk. En daan de Vors dao gans hoeg bovenop! Wat wèlt de Wiekeneer nog mie? Niks anders es 'ne gooje Vastelaovend. En dat geit zeker lökke. Vastelaovend 2017 weurt weer 'ne memorabele. In Wiek meh zeker ouch in de res vaan Mestreech. Goejt uuch dedoor, maak get sjieks devaan. En... Vastelaovend vierste same! Dao goon veer veur. Daot geer allemaol mèt?

Vivianne Rijnders ©

**JOHN  
MULLINS**

MAASTRICHT  
Wycker Brugstraat 50  
Telefoon 043 - 3500141




**BOUCHON D'EN FACE**

Wyckerbrugstraat 54 • 6221 ED Maastricht

**TRAMHALTE**

*Kitchen & Bar*

Uw gastheren: Rick Moenen en Rob Cimmermans  
Cannerplein 1 Maastricht



*Amrâth Grand Hotel*

★★★★

**DE L'EMPEREUR**

MAASTRICHT

Stationsstraat 2 • 6221 BP Maastricht



**EMILE**


*coiffeur*

Dorpstraat 36 A - Heer  
www.kapsalonemile.nl  
Mireille Bucholz  
(volgens afspraak)



**NOVO**  
NEW DINING

wilhelminasingel 39 / 6221 be maastricht  
043 - 20411 69  
info@novo-dining.com / www.novo-dining.com



**'t Rommedoeke**  
kaas - noten - wijn & delicatessen

Brusselsepoort 37, 6216 CG Maastricht  
WyckerBrugstraat 43, 6221 BB Maastricht  
De Leim 8, 6227 CT Maastricht  
Tel. 043 - 3430308 [www.rommedoeke.nl](http://www.rommedoeke.nl)

MAASLANDS LIJSTENMAKERIJ

RECHSTRAOT 77  
6221 EH MESTREECH  
TÈL. 043. 3250510

VEUR AL EUR KUNS, AAIJD EN MODERN, SPIEGELS EN RESTAURATIE

MAASLANDS ANTIQUARIAAT  
LIJSTENMAKERIJ RIVE GAUCHE



DE POSHOORN IRIN



TAPPERIJ & STADSHERBERG

DE VASTELAOVENDSTEMPEL  
VAAN WYCK



**Joep Schürmann**  
vleesspecialiteiten

Joep Schürmann vleesspecialiteiten Wycker Brugstraat 27 Wyck Maastricht 043/3213913

# WIEKER PARAAD 2017

Allewel me in Wiek ummertouw wieneger plaats heet um op 'n behöbbeleke meneer te loupe vint op 19 fibberwarie a.s. tóch weer de Wiek Paraad plaats. 't Zal good oetkieke gebloze zien es me bij de Euroscop de Wilhelminasingel wèlt euversteke, want dao höbbe ze 't zebraaad weggesjèlderd en vlege d'ch vaan alle kante de bösse um de oere. Es lui rieving Stasie goon mote ze oplètte tot ze neet 'n groete kojil vol water inloupe, en tot ze z'ch in ganzepas langs de gievels mote sjravele.

Mer veur de Zaaite Hermeniekes is d'r toch wel get miejer nudeg um hun vaan de straot te hawwe, want op 19 fibberwarie zalle zie Wiek weer gezèlleg op stelte zette mèt zuver en (nog miejer) valse toene. En zie kinne z'ch dit jaor good höbbe, want d'r zien dit jaor nui kaffees in de röt opgenome zoetot v'r dit jaor op 7 plaatse terech kinne. Vaan de WalkAbout op 't Cörversplein tot aon 't Brand Beerhoes aon de Stasie, en vaan Kien (Kaffee Swaree) bij de kèrk in de Rechstraot tot aon 't (vernuide) Pruske op de Hoegbrökstraot, mèt dao tösse Bar Brutal in de Alexander Battalaon, Novo-new dining in de St. Maartenslaon en De Poshoorn in de Stationsstraot. .... in edere oethook vaan Wiek zal 't Vastelaovendsfenomeen 't Zaaite Hermenieke z'n spore achter laote!

Daoneve zalle in de loup vaan de middag de (zjubilerende) Kachelpiepers hun opwachting make en de 68e Vors vaan De Keemeleers 'n serenaad bringe bij 't podium tegeneuver De Poshoorn. Bij dat podium is euveregens de ganse middag muzikaol ammuzemint, ouch es de hermeniekes onderweeg zien.

Vaanzellevers steit mèt doen bove winne in de Wiek Paraad, mer veer zien toch raozend benuid wee in de vootspore vaan 'Naat & Druug' geit trije; is dat 'Fuerte, Alto & Borracho', of welleich 'Um te Jenke' of Sous Bras Band 'Tête de Veau'? Of zien veer dit jaor 'Blamaasj', 'Vreug & Neugter' of de samespeulende hermeniekes 'Greun & Sjerrep' en 'Veur De Bok Z'n Kloete' z'ch mèt 't vaat beer oet de veuj make? Of höbbe v'r nóg 'ne kanschöbber euver de kop gezeen.....?

Tot d'r veur de zoevöölste kier weer muzikaol geweld in Wiek zal losbarste, is 'n zaak wat zeker is. V'r zalle 't zien (en hure) op zondag 19 fibberwarie a.s.



CATERING  
THUISKOK  
LUNCH  
WORKSHOP

06 48266613 - info@adventurecook.nl  
[www.adventurecook.nl](http://www.adventurecook.nl)

# De manjefieke Seniorematinee vaan de Keemeleers

Zoe wie eder jaor op d'n twiede zondag veur de Vastelaovend hawwe de Keemeleers hunne seniorematinee in de groete, prachteg verseerde zaol vaan Amrath Grand Hotel de l'Empereur aon de statie. Dit doen de Keemeleers al miejer es 60 jaor...

De Keemeleers zien daan ouch gruuts d'r op tot zie d'n entree gratis aon al hun genudegde kinne aonbeeje.

Vaanaof 13.11 struimp de zaol vol mèt, mèt naome, seniore en aander lui die us de Vastelaovend mèt de paplepel hōbbe ingegeve. Geer moot toch gaw aon zoe'n 250 lui dinke, oet Groet Wieck en umstreke. Nao ziech te hōbbe genèsteld op 'ne stoel aon 'n lang taofel kriege, jao, geer les 't good, kriege zie 'n tas koffie mèt e stōkske vlaoj. De dames-Keemeleers hōbbe 't daan hiel drōk um alle lui good te bedene.

Daan kin 't fies beginne...

Mèt 'ne zwajeuse entree kump de keersveerse Vors samen mèt de Keemeleers de zaol binne, veuraof gegaange door euze zjubelerende cirremoniemeister Herman van der Molen. Naotot de lui evekes good gezoonge en gesproonge hōbbe, kin 't program beginne. De ierste drōpkjes en pōtsjes beer stoon daan al op de taofels.

'ne Groete kōr aon artieste geit daan de ganse middag optreije...

't Program weurt eder jaor door Keemeleer Frans Maessen ineingefisternōld, heer heet dao altied 'nen hielen kluij aon, want heer moot passe en mete mèt de bijeingesprokkelde cent vaan de Keemeleers. Want es geer meint tot die artieste vaan de loch kinne leve, daan hōb g'r 't mis...

De zaol en 't podium zien prachteg verleech door Soft en Sound en veurzeen vaan professioneel geluid dankzij Henk en Roland van den

Hof. Es de Vors en de Keemeleers ouch in hunne zetel zien neergestreke, kin Keemeleer Fred Leclair d'n iersten artiest aonkōndege. Mèt 'ne buuttemarsj weurt dee daan vaan achter oet de zaol 't podium opgebracht. Daan geit 't los...

Zengers, buutreedners, dansmariekes en aander kunstemekeers vōlle daan achterein 't podium. En de lui in de zaol... die goon los, hielemaal los kin iech uuch vertèlle. Want d'ch ammezere heet niks mèt leeftied te make, zeker neet es e pōtsje beer debij gedroonke weurt; d'ch ammezere zit diech in 't blood!

Zoe hōbbe veer al hiel get bekinde artieste op eus podium mage hōbbe: Frans Theunisz, Beppie Kraft, W-Dreej, Jef Verheijde, Les Froeures Coupuleurs, Thei en Marij, de Waggel Tenoren, Erwin, Frans Croonenberg, Duo X-Elle, de Lollies, Joie de Vivre, Saskia Theunisz... enfin, vāols te vāol um op te neume.

Aon 't ind vaan deze manjefieke matinee goon eus gaste zier voldoon en kepotmeuj trōk nao hoes!

Eder jaor opnui wete de Keemeleers dit tot e zier geslaag evenemint te make. Mehheh, dit kinne de Keemeleers neet allein, wie g'r zalt begriepen... e groet woord vaan dank is hei daan ouch op z'n plaats aon eus adverteerders, sponsore en de lede vaan de club vaan 100 die dit alles financieel meugelek make.

Es geer dit sjiek fies ouch 'ns wèlt beleve of us wèlt steune of 'n aander bijdrage aon dit evenemint wèlt lievere, daan zeet g'r vaan harte oetgenudeg. Nump vaan teveure wel evekes kontak mèt (eine vaan) us op.

*'n Mam sjik häöre zoon 'n appke:*

*"Jeanke, wat weurt bedoeld met IWTN, IHVD en TL?"*

*Sjrijf Jeanke trök:*


*"Iech weit 't neet, iech haw vaan diech, tot later"*

*Sjrijf mam: "Dat gief niks jong, iech vraog 't wel aon die zusterke.*

*Iech haw ouch vaan diech"*

# www.Secondhand 4 All

**MAASTRICHT  
BREDESTRAAT 16  
A. BATTALAN 38**



**" IN DE KARKOL "**

**Stokstraat 5  
6211 GB Maastricht  
Telefoon 043 - 3217035**



Vastelaovendsvereiniging De Keemeleers organiseert  
in samewèrking mèt De Gulpener Brouwerij,  
Draankenhandel Koekkelkoren en Pepsi

# Wieker

## P A R A A D

Zoondag 19 fibberwarie 2017



KAFFEE SWAREE  
KAFFEE 'T PRUUSKE  
TAPPERIJ DE POSHOORN  
BRAND BEERHOES  
WALK ABOUT  
NOVO NEW DINING  
BAR BRUTAL

AONVAANK 14.11 OOR in de Wieker Brökstraot



# CORTJENS

Druk met Communicatie



Drukken of printen



Grafisch ontwerp



Sign groot formaat



Responsive webdesign

Demertstraat 4  
6227 AR Maastricht  
043 3614718  
www.CortjensDC.nl